

↓. Jangan paksa sistem nilai

11 OCT 1988

NEW YORK, Rabu — Datuk Seri Dr Mahathir Mohamad kesal dengan sikap sesetengah negara kaya yang cuba memaksakan negara miskin menerima interpretasi dan sistem nilai yang mereka amalkan.

Katanya, demokrasi memberi kebebasan memilih dan tidak ada negara yang berhak mengatakan demokrasi yang dianutnya lebih baik daripada demokrasi negara lain.

Katanya, negara Barat mengambil masa beratus-ratus tahun untuk muncul sebagai negara demokrasi, jadi janganlah mengharapkan bekas tanah jajahan mereka yang berabad lamanya di bawah pemerintahan autokratik menjadi negara demokrasi yang sempurna dalam tempoh yang singkat.

"Tidak ada siapa yang berhak memaksa pilihan dan takrifnya ke atas orang lain. Adalah satu tragedi jika negara yang sudah pun demokrasi dan makmur, dimusnahkan oleh beberapa orang yang mendakwa negara itu belum cukup demokratik.

"Sikap 'saya lebih baik daripada anda' tidak sesuai lagi di zaman moden ini," katanya ketika berucap di Perhimpunan Agung Pertubuhan Bangsa-Bangsa Bersatu (PBB) Ke-43, di sini petang semalam.

Datuk Seri Dr Mahathir selanjutnya membidas negara kaya yang menggunakan demokrasi untuk memaksa negara miskin menerima ideologi, falsafah dan sistem nilai mereka.
